


**BOSNA I HERCEGOVINA
FEDERACIJA BOSNE I HERCEGOVINE
URED ZA REVIZIJU INSTITUCIJA U FBiH
SARAJEVO**



Ložionička 3, 71000 Sarajevo, Tel: + 387 (0)33 723-550, Fax: 716 400, www. saifbih.ba, e-mail: urrevfed@bih.net.ba, saifbih@saifbih.ba


UR: 023/06;030/06-07

**IZVJEŠTAJ
O REVIZIJI FINANSIJSKIH IZVJEŠTAJA
MEDICINSKOG FAKULTETA SARAJEVO
NA DAN 31.12.2006. GODINE**

Sarajevo, oktobar 2007. godine

**BOSNA I HERCEGOVINA
FEDERACIJA BOSNE I HERCEGOVINE
URED ZA REVIZIJU INSTITUCIJA U FBiH
SARAJEVO**

Ložionička 3, 71000 Sarajevo, Tel: + 387 (0)33 723 550, Fax: 716 400, www. saifbih.ba, e-mail: urrevfed@bih.net.ba



**MENADŽMENTU
MEDICINSKOG FAKULTETA
SARAJEVO**

NEOVISNO REVIZIJSKO MIŠLJENJE

1. Obavili smo reviziju finansijskih izvještaja Medicinskog fakulteta u Sarajevu, iskazanih na stranicama od 1 do 9 na dan 31.12.2006. godine. Za ove izvještaje odgovoran je menadžment fakulteta. Naša odgovornost se svodi na izražavanje mišljenja finansijskim izvještajima na temelju provedene revizije.
2. Reviziju smo obavili na osnovu ovlaštenja u skladu sa Zakonom o reviziji institucija u FBiH ("Službene novine FBiH" broj 22/06), i sa INTOSAI međunarodnim revizijskim standardima. Ovi standardi zahtijevaju planiranje i obavljanje revizije, tako da revizija pruža razumno uvjerenje o tome ima li u finansijskim izvještajima značajnih grešaka kao i da li su finansijske transakcije izvršene u skladu sa zakonskim propisima. Revizija je uključila ispitivanje, testiranje i prikupljanje dokaza koji potkrepljuju iznose i objave u finansijskim izvještajima. Revizija je također obuhvatila ocjenu primijenjenih računovodstvenih načela, vrednovanje sveukupne prezentacije finansijskih izvještaja kao i ocjenu primjene propisa. Vjerujemo da je provedenom revizijom prikupljeno dovoljno dokaza kako bi se stvorile pouzdane osnove za izražavanje našeg mišljenja.
3. Nakon provedene revizije finansijskih izvještaja na dan 31.12.2006. godine, skrećemo pažnju na slijedeće:
 - *uspostavljeni sistem internih kontrola nije adekvatan u dijelu primjene zakonskih propisa u načinu planiranja, evidentiranja i donošenja Finansijskog plana, bez saglasnosti Ministarstva obrazovanja i nauke, kao i načina izmjene i dopune finansijskog plana bez propisane procedure uređene Zakonom o budžetima u FBiH,*
 - *organ rukovođenja i organ upravljanja nisu uredili sve akte Fakulteta, a što se posebno odnosi na Pravilnik o organizaciji i sistematizaciji Fakulteta, koji čini osnov za izradu i donošenje akata o načinu obračuna i isplate plaća zaposlenih Fakulteta,*
 - *nije utvrđena metodologija za evidentiranje i priznavanje prihoda koji se odnose na utvrđeni obračunski period, niti je evidentiranje prihoda dodiplomskog studija vršeno u skladu sa odredbama Pravilnika o knjigovodstvu budžeta u FBiH,*
 - *redovnim godišnjim popisom sredstava i izvora sredstava nije obuhvaćen popis obaveza, kao i popis potraživanja Fakulteta od 118.969,86 KM iz perioda 2003.-2006. godine, koja nisu evidentirana kao potraživanja Fakulteta, što potvrđuje da u bilansu stanja nisu realno iskazana potraživanja za navedeni iznos i da popis nije izvršen na način uređen Pravilnikom o knjigovodstvu budžeta u FBiH,*
 - *isplate po osnovu ugovora o autorskom djelu i obračun poreza nije vršen u skladu sa Zakonom o porezima Kantona Sarajevo i Zakonom o obligacionim odnosima,*

obračunavani i plaćani porezi po stopi koja ne odgovara predmetu ugovora, odnosno zaključeni ugovori o autorskom djelu nemaju karakter autorskog djela i na iste se nije mogla primijeniti stopa obračuna poreza za autorsko djelo,

- *obračun i isplata troškova prevoza na posao i sa posla od 93.386,80 KM, nije vršena u skladu sa Uredbom o naknadama i drugim materijalnim pravim koja nemaju karakter plaće u FBiH, u visini najviše do iznosa cijene mjesečne ili dnevne karte u javnom saobraćaju na određenoj relaciji.*
4. *Po našem mišljenju, finansijski izvještaji, osim za usklađivanja u prethodnoj tački, daju istinit i fer pregled o finansijskom stanju i rezultatima poslovanja Medicinskog fakulteta Sarajevo za godinu koja se završava na dan 31.12. 2006. godine.*

Zamjenik generalnog revizora

Branko Kolobarić, dipl. oec.

Generalni revizor

Mr. Sc. Ibrahim Okanović, dipl. oec

IZVJEŠTAJ

O OBAVLJENOJ REVIZIJI FINANSIJSKIH IZVJEŠTAJA MEDICINSKOG FAKULTETA SARAJEVO ZA 2006. GODINU

1. UVOD

Medicinski fakultet Sarajevo (u daljem tekstu fakultet) upisan je u sudski registar kod Kantonalnog suda Sarajevo Rješenjem UF/I-570/02 od 11.04.2002. godine na osnovu Zakona o visokom obrazovanju, a osnovan je na osnovu Zakona o Medicinskom fakultetu («Sl. list Republike BiH» 42/46).

Djelatnost Fakulteta je: nastavna, naučno-istraživačka, zdravstvena i izdavačka. U okviru nastavne i naučno-istraživačke djelatnosti, Fakultet organizuje i realizuje: nastavni rad za sticanje visoke stručne sprema i stručnog naziva doktor medicine, nastavni rad za sticanje naučnog stepena magistra, odnosno stručnog stepena specijaliste medicine. Sticanje naučnog stepena doktora medicinskih nauka, stalne i povremene oblike stručnog usavršavanja. Fakultet obavlja i naučno - istraživački rad u skladu sa Zakonom o naučno-istraživačkoj djelatnosti. U okviru zdravstvene djelatnosti Fakultet pruža stručno-ekspertizne usluge u području dijagnostike, terapije i preventivne djelatnosti. Fakultet svoju djelatnost obavlja u skladu sa godišnjim programom rada i dugoročnim programom razvoja.

Osnivač Fakulteta je Kanton Sarajevo i isti je u sastavu Univerziteta u Sarajevu. Upravljačku funkciju na Fakultetu vrši Upravni Odbor, a nadzornu Nadzorni odbor. Dekan rukovodi Fakultetom, a imenuje ga Upravni odbor na osnovu javnog konkursa uz saglasnost osnivača.

Nastavno naučno vijeće Fakulteta je najviši nastavno-naučni i stručni organ Fakulteta čijim radom rukovodi Dekan Fakulteta.

Fakultet svoju nastavnu djelatnost realizuje kroz institute, (institut za anatomiju, fiziologiju biohemiju, histologiju i embriologiju, patologiju, farmakologiju i toksikologiju, patološku fiziologiju, higijenu i zaštitu životne sredine i institut za sudsku medicinu), kroz katedre (katedra za biologiju, fiziku, hemiju, mikrobiologiju i parazitologiju, radiologiju i onkologiju, internu medicinu, infektivne bolesti, za hirurgiju, neuropsihijatriju, ginekologiju, pedijatriju, fizijatriju i rehabilitaciju), centre (za postdiplomski studij i kontinuiranu edukaciju zdravstvenih radnika) i Sekretarijat Fakulteta sa stručnim službama.

Sredstva za rad Fakulteta u skladu sa Zakonom o visokom obrazovanju Kantona Sarajevo, obezbjeđuju se iz Budžeta Kantona Sarajevo.

Na dan 31.12.2006. godine ukupan broj uposlenih na Fakultetu je činio 204 djelatnika.

Prema podacima Studenske Službe ukupan broj upisanih studenata u školskoj 2006/2007 godini od I do VI godine studija je 1391 student.

Sjedište Fakulteta je u Sarajevu u ul. Čekaluša broj 90.

2. PRETHODNE REVIZIJE

Ured za reviziju institucija u Federaciji Bosne i Hercegovine prvi put vrši reviziju finansijskih izvještaja Medicinskog Fakulteta u Sarajevu. Obzirom da nismo vršili reviziju finansijskih izvještaja u prethodnom periodu, ne dajemo mišljenje o iskazanim početnim stanjima na dan 01.01. 2006. godine.

3. CILJ I OBIM REVIZIJE

Cilj revizije finansijskih izvještaja je da se na osnovu ispitivanja dokumenata, izvještaja, internih kontrola, računovodstvenih i finansijskih postupaka, te drugih evidencija izrazi mišljenje da li su finansijski izvještaji pripremljeni u skladu sa važećom zakonskom regulativom. Revizija je planirana i izvršena sa ciljem pribavljanja realne osnove da li finansijski izvještaji odražavaju tačan i istinit prikaz poslovanja tokom godine i stanja na kraju godine. Revizija će utvrditi: da li su poduzete sve mjere za planiranje, ubiranje, čuvanje javnih prihoda, da li se menadžment pridržavao zakonskih propisa, da li su isplate javnih rashoda i korištenje javnih prihoda vršene po odgovarajućim ovlaštenjima i za svrhe za koje je dato ovlaštenje.

Cilj revizije je postizanje transparentnosti u radu, povećanje javne odgovornosti za zakonitost rada, kao i uspješno i efikasno provođenje postavljenih ciljeva. Revizija je obuhvatila procjenu organizacije i funkcionisanja sistema internih kontrola i imovinskog i finansijskog stanja Fakulteta, provjeru izvršenja Finansijskog plana za 2006. godinu, te finansijske transakcije i njihovu zakonsku usklađenost i dokumentovanost. Budući da smo reviziju obavili na bazi uzorka, postoji mogućnost da neke pogreške i nepravilnosti mogu ostati neotkrivene. Revizija, također, uključuje i davanje preporuka za dalji rad, sa posebnim naglaskom na što efikasniju i ekonomičniju zaštitu imovine i trošenje sredstava, a što čini podlogu za uspostavljanje efikasnog sistema internih kontrola.

4. NALAZI I PREPORUKE

4.1. Menadžment i sistem internih kontrola

Uvidom u dokumentaciju nismo se uvjerali da je uspostavljen adekvatan sistem internih kontrola, što potvrđuju prezentirani akti Fakulteta. Akt o organizaciji i sistematizaciji poslova i zadataka Fakulteta donesen je 1988. godine i isti je na snazi 19 godina, a osnov donošenja je Zakon o udruženom radu SFRJ čije odredbe nisu preuzete propisima Republike BiH. Poslovi i zadaci Fakulteta su organizirani i povezani u organizacije udruženog rada, što je u potpunoj suprotnosti sa statusom Fakulteta osnovanog i upisanog u sudski registar kao Javna ustanova za obavljanje djelatnosti obrazovanja, naučno-istraživačkog rada u kojoj radnici ostvaruju svoja prava u skladu sa zakonom, kolektivnim ugovorom i pravilima ustanove. Istim pravilnikom uređeni su i uslovi za obavljanje poslova i radnih zadataka Fakulteta. Poslovi Fakulteta su razvrstani u osam stepena stručne spremlje ne objašnjavajući koji stepen odgovara stručnoj spremi osim obrazloženja složeni, vrlo složeni i visoko složeni poslovi.

Pravilima Fakulteta, koja su donesena u januaru 2002. godine uređena ja obaveza Dekana fakulteta da predloži organizaciju i sistematizaciju radnih mjesta, sa obavezom da isti donese Upravni odbor. Međutim navedeno potvrđuje da nije predložen, odnosno da nije donesen i da ne možemo potvrditi da su organi fakulteta izvršavali u potpunosti uređene obaveze. Pravilima Fakulteta uređeno je da Fakultet ostvaruje zadatke iz nastavnog, naučno-istraživačkog i zdravstvenog rada preko instituta, katedri, centara i verifikovanih nastavnih baza Fakulteta sa obavezom da se aktom o unutrašnjoj organizaciji utvrdi koji su to instituti. Naveli smo da takav akt nije donesen, a nastavna djelatnost, naučno istraživačka i zdravstvena djelatnost Fakulteta vršila se preko instituta koji nisu aktom o organizaciji i sistematizaciji predloženi, odnosno usvojeni od organa Fakulteta. Na nivou Fakulteta donesen je i Pravilnik o plaćama i drugim primanjima nastavnika, saradnika i ostalih zaposlenika Fakulteta sa koeficijentima složenosti i kvaliteta rada zaposlenika sa rasponom između pojedinih radnih mjesta, a osnov za donošenje navedenog akata je akt o organizaciji i sistematizaciji Fakulteta, koji nije usklađen sa važećim zakonskim propisima.

Dokumentacija blagajničkog poslovanja, potvrđuje evidentiranje novčanih transakcija u zbirnim iznosima koji se sastoje od različitih vrsta isplata i uplata. Također nije se svakodnevni promet blagajne iskazivao u dnevnom blagajničkom izvještaju, odnosno promet za veći broj dana iskazivan u jednom blagajničkom izvještaju. Prezentirana dokumentacija, blagajnički izvještaji potvrđuju da nisu potpisani od ovlaštene osobe za kontrolu. Također nalozi za knjiženje prometa blagajne od 30.04.2006. godine u visini 189.636,55 KM i blagajna od 31.07.2006. godine od 88.017,69 KM ne potvrđuju da su potpisani od osobe za izdavanje naloga, kontiranje, knjiženje i kontrolu, što potvrđuje ne funkcionisanje kontrole u ovom dijelu rada. Slabosti sistema internih kontrola utvrđene su i kod usvajanja finansijskog plana i izmjena i dopuna finansijskog plana, evidentiranja i priznavanja prihoda, evidentiranja i isplate plaća, toplog obroka, prevoza uposlenih, autorskih honorara i nepotpunog popisa.

Provođenje Zakona o budžetu u FBiH i Zakona o trezoru u FBiH na uspostavljanju Jedinostvenog računa Trezora na nivou Kantona i gašenje svih računa budžetskih korisnika, na Fakultetu nije realizovan. Fakultet je i u 2006. godini imao status korisnika koji je svoje poslovanje obavljao preko sopstvenog transakcijskog računa, a trezorski način poslovanja na nivou Kantona uspostavljen je polovinom 2003. godine.

Potrebno je da organi Fakulteta u skladu sa važećom zakonskom regulativom, Zakonom o javnim ustanovama, Zakonom o visokom obrazovanju, urede organizaciju i sistematizaciju i usklade poslovanje Fakulteta sa Zakonom o budžetu u FBiH, Zakonom o trezoru u FBiH.

Potrebno je da nadležni organi fakulteta vrše kontrolu poslovanja fakulteta, odnosno da izvršavaju svoje dužnosti uređene Zakonom o javnim ustanovama, Zakonom o visokom obrazovanju i Pravilima Fakulteta.

Potrebno je uspostaviti sistem internih kontrola koji će osigurati adekvatnu kontrolu trošenja sredstava fakulteta, pridržavajući se Smjernica za uspostavu i jačanje internih kontrola kod budžetskih korisnika donesenih od strane Federalnog ministarstva finansija.

4.2. Izrada i donošenje Finansijskog plana za 2006. godinu

U skladu sa Zakonom o budžetima u FBiH, Zakonom o ustanovama i važećim podzakonskim aktima (Pravilima Fakulteta) Upravni odbor donio je finansijski plan za 2006. godinu 30.12.2005.godine, kojim su utvrđeni prihodi u iznosu od 6.514.262,00 KM i na koji nije data saglasnost osnivača Fakulteta. Izmjene i dopune Finansijskog plana izvršene su u novembru 2006. godine usvojene Odlukom Upravnog odbora od 29.12.2006.godine. Izmjenama Plana prihodi su uvećani za 203.569,00 KM ili 3,12%. Navedenim izmjenama su također i izvršena povećanja pozicija troškova za materijal i usluge za 99.731,00 KM, bruto plaća za 95.082,00 KM i doprinosa poslodavca 10.540,00 KM. Iz prezentiranog finansijskog plana nije vidljivo da je Fakultet planirao posebno troškove po osnovu sredstava iz Budžeta i troškove po osnovu vlastitih sredstava ostvarenih vršenjem svoje djelatnosti, što je obaveza svakog budžetskog korisnika uređena Zakonom o budžetima u FBiH. S obzirom da je izmjena i dopuna Budžeta Kantona za 2006. godinu izvršena u julu 2006. godine, a izmjene i dopuna Plana Fakulteta usvojene Odlukom Upravnog odbora kako smo naveli 29.12.2006. godine ukazuje da izmjene i dopune plana nisu izvršene po propisanim procedurama utvrđenim Zakonom o budžetima u Federaciji Bosni i Hercegovini, čije su izmjene istovremeno povlačile izmjenu i dopunu plana Resornog ministarstva a istovremeno i Budžeta na nivou Kantona i usvajanje od Skupštine Kantona, za što dio odgovornosti snosi i resorno ministarstvo neobezbjeđenjem adekvatnog nadzora.

Potrebno je da Fakultet u skladu sa Zakonom o budžetima u FBiH u finansijskom planu planira izdatke po osnovu prihoda ostvarenih iz Budžeta Kantona i izdatke po osnovu prihoda ostvarenih vršenjem svoje djelatnosti.

Potrebno je da organi fakulteta Finansijski plan, kao izmjene i dopune Finansijskog plana za budžetsku godinu donose u skladu sa Zakonom o budžetima u FBiH

4.2.1. Prihodi

Prema prezentiranim računovodstvenim iskazima ukupno iskazani prihodi za 2006. godinu su 6.735.747,00 KM, a čine ih prihodi iz Budžeta Kantona Sarajevo 4.253.650,00 KM, prihodi ostvareni od vlastite djelatnosti 2.392.816,00 KM. Tekuće potpore od ostalih nivoa vlasti (Federacije, kantona) iskazane su 74.281,00 KM i odnose se na naučno istraživačke projekte i kapitalne potpore 15.000,00 KM za projekat «Lan».

Prihod ostvaren po osnovu vlastite djelatnosti čini prihod od pružanja javnih usluga 2.328.448,00 KM i prihod od imovine 64.368,00 KM.

U kategoriji prihoda od pružanja javnih usluga, iskazani su prihodi po osnovu dodiplomskog i postdiplomskog studija 1.293.472,70 KM, prihodi od pružanja intelektualnih i drugih usluga 966.725,00 KM, prihodi od instruktivne nastave 38.361,94 KM i prihodi od pružanja profesionalno-dijagnostičkih i stručnih usluga građanima 29.889,06 KM.

Prihod u iznosu od 1.293.472,70 KM ostvaren je po osnovu pružanja usluga dodiplomskog studija 650.121,04 KM participacije studenata u troškovima studija i prihod od pružanja usluga za postdiplomski studij 643.351,66 KM za sticanje naučnog stepena magistra, kao i naplatu participacije u troškovima pripreme, izrade i odbrane doktorske disertacije na osnovu Odluke koju je donio Upravni odbor fakulteta. Uvidom o dokumentaciju uplate naknada za dodiplomski studij nije se evidentirao kao odgođeni prihod na poziciji razgraničenih prihoda (obzirom da budžetska godina ne odgovara školskoj godini), a nisu utvrđene ni računovodstvene politike o načinu evidentiranja vlastitih prihoda, što dovodi u pitanje realnost iskazanih iznosa.

Dio prihoda ostvaren je od pružanja usluga instruktivne nastave (38.361,94 KM) odnosi se na uplate studenata za instruktivnu nastavu izvršenu prije upisa studenata na Fakultet.

Iznos od 966.725,00 KM evidentiran je kao prihod od izvođenja nastave iz medicinskih nastavnih predmeta na fakultetima (Stomatološkom, Farmaceutskom, Visokoj zdravstvenoj školi), po osnovu zaključenih ugovora o uređenju međusobnih prava i obaveza o izvođenju nastave predviđene nastavnim planom i programom navedenih Javnih ustanova i obavezom Medicinskog fakulteta da obezbijedi potrebne nastavnike i saradnike neophodne za realizaciju tih planova, kao i prihodi evidentirani od pružanja usluga instituta koji su u sastavu Fakulteta, a ostvareni su na osnovu cjenovnika Fakulteta.

U kategoriji prihoda od imovine su prihodi po osnovu izdatog poslovnog prostora u zakup 58.041,14 KM i ostali prihodi od imovine 6.326,96 KM. Prihodi od zakupa ostvareni po osnovu zaključenih ugovora o zakupu poslovnih prostora sa Preduzećem «Klas» d.d. Sarajevo sačinjen u junu 2003. godine, na period od 5 godina, čije odredbe ne uređuju koja se površina prostora daje u zakup, dok je cijena zakupa određena od 12,00 KM po m². Prezentirane fakture potvrđuju da je Fakultet ispostavljao fakture po navedenom ugovoru na površinu od 176,40 m² i cijeni 12,00 KM. Također prihod ostvaren po osnovu ugovora o zakupu zaključen sa «New Concept Garden» Sarajevo u decembru 2002. godine također na period 5 godina sa ustupanjem površine 286,00 m² po cijeni od 8,00 KM i Ugovor zaključen na neodređeno vrijeme sa Udruženjem farmakologa FBiH sa mjesečnom cijenom od 600,00 KM za izdatu površinu od 60 metara i cijeni od 10,00 KM po metru kvadratnom. Prezentirani ugovori potvrđuju da su ugovorene cijene različite od ugovora do ugovora i da jedana ugovor ne sadrži količinu površine, koja čini jedan od osnovnih elemenata ugovora, odnosno osnov da se pristupi zaključenju ugovora, kao i osnov za ispostavljanje visine fakture za ustupljeni prostor.

Potrebno je donijeti Računovodstvene politike, kojim bi se regulisala metodologija za priznavanje dijela odgođenih prihoda u obračunskoj godini, preispitati zaključene ugovore o zakupu i po istim poduzeti adekvatne mjere.

4.2.2. Rashodi i izdaci za 2006. godinu

Ukupni rashodi i izdaci u 2006. godini iskazani su u iznosu od 6.670.123,00 KM, što je u odnosu na izmjene i dopune Plana od 6.717.831,00 KM manje za 47.708,00 KM ili za 0,71 %. Višak prihoda nad rashodima iskazan je u iznosu od 65.624,00 KM i struktura istih je prikazana je u slijedećoj tabeli:

R. br.	Opis	Izmjene i dopune za 2006.g.	Ostvareno u 2005.g.	Ostvareno u 2006.g.	Odstupanje (5 - 3)	Index (5/3)
1	2	3	4	5	6	7
A. UKUPNO IZDACI (I + II)		6.717.831,00	6.372.949,00	6.670.123,00	- 47.708,00	99,29
I TEKUĆI IZDACI (a + b + c + d)		6.567.462,00	6.098.721,00	6.521.707,00	- 45.755,00	99,30
a) Plaće i nakn. trošk. zaposl. i zast.		3.796.086,00	3.533.803,00	3.823.429,00	27.343,00	100,72
1.	Bruto plaće i naknade plaća	2.857.132,00	2.749.561,00	2.904.273,00	47.141,00	101,65
2.	Naknade troškova zaposlenika	938.954,00	784.242,00	919.156,00	- 19.798,00	97,89
b) Doprinosi poslodavca (= 3)		316.710,00	304.720,00	321.748,00	5.038,00	101,59
3.	Doprinosi poslodavca	316.710,00	304.720,00	321.748,00	5.038,00	101,59
c) Izdaci za materijal i usluge		2.447.666,00	2.254.061,00	2.368.510,00	- 79.156,00	96,77
4.	Putni troškovi	41.150,00	41.566,00	41.050,00	-100,00	99,76
5.	Izdaci za energiju	263.500,00	236.493,00	229.924,00	- 33.576,00	87,26
6.	Izdaci za komunalne usluge	113.700,00	103.121,00	106.310,00	- 7.390,00	93,50
7.	Nabavka materijala	171.600,00	188.841,00	169.850,00	- 1.750,00	98,98
8.	Izdaci za usluge prevoz. i goriva	2.700,00	2.568,00	3.280,00	580,00	121,48
9.	Unajmljiva. imovine i opreme	-	2.292,00	-	-	-
10.	Izdaci za tekuće održavanje	35.300,00	37.110,00	35.945,00	645,00	101,83
11.	Izdaci za osigura. i bank. usluge	24.350,00	14.428,00	26.524,00	2.174,00	108,93
12.	Ugovorene i druge usluge	1.795.366,00	1.627.642,00	1.755.627,00	- 39.739,00	97,79
d) Tekući grantovi (od 13 do 14)		7.000,00	6.137,00	8.020,00	1.020,00	114,57
13.	Grantovi drugim nivoima vlade	-	587,00	-	-	-
14.	Grantovi neprofitnim organiz.	7.000,00	5.550,00	8.020,00	1.020,00	114,57
II KAPITALNI IZDACI (= e)		150.369,00	274.228,00	148.416,00	- 1.953,00	98,70
e) Izdaci za nabavku stalnih sredstava		150.369,00	274.228,00	148.416,00	- 1.953,00	98,70
15.	Nabavka građevina	-	11.190,00	-	-	-
16.	Nabavka opreme	107.000,00	216.053,00	112.275,00	5.275,00	104,93
17.	Rekonstrukcija i investic. održa.	43.369,00	46.985,00	36.141,00	- 7.228,00	83,33

4.2.2.1. Bruto plaće i naknade

U 2006. godini izdaci za bruto plaće, naknade plaća sa doprinosima poslodavca iskazani su u iznosu od 3.226.021,00 KM i u odnosu na prošlu godinu veći su za 171.740,00 KM ili za 5,62 %, a u odnosu Plan veći su za 52.179,00 KM ili 1,64 %.

Na osnovu prezentirane dokumentacije plate su planirane na bazi 204 uposlena, za koje je iz Budžeta trebalo obezbjediti dio sredstava. Obzirom da u Finansijskom planu Fakulteta nisu planirani izdaci koji će se finansirati iz Budžeta, a koji iz sredstava ostvarenih po osnovu vlastitih prihoda i da u knjigovodstvenoj evidencija nisu analitički obezbjeđeni podaci iz kojih bi se mogao vidjeti doznačeni iznos za plaće i naknade, nije bilo mogućnosti za praćenje potrošnje sredstava u odnosu na Plan kako na sredstva koja su doznačena iz Budžeta Kantona tako i u odnosu na vlastita sredstva. Obračun plaća vršen je na osnovu Pravilnika o plaćama i drugim primanjima nastavnika, saradnika i ostalih zaposlenika Medicinskog fakulteta u Sarajevu koji je Upravni odbor donio 17. jula 2002. godine i odluka Upravnog odbora o vrijednosti koeficijenta za obračun plaće od 130,00 KM. Na osnovu prezentirane dokumentacije obračuna plaća za januar, juni i decembar 2006. godine utvrđeno je da se vrijednost koeficijenta nije mijenjala, odnosno da se utvrđena visina primjenjivala tokom cijele godine. Koeficijenti iz Pravilnika o plaćama po nazivu radnog mjesta-zvanja ne odgovaraju aktu o organizaciji i sistematizaciji Fakulteta, odnosno akti nisu usaglašeni. Također obračun i isplata plaća vršila se za određena radna mjesta koja nisu određena Pravilnikom o plaćama, a istovremeno ni koeficijenti za obračun plaće tog radnog mjesta. Također, obračun plaća za određena zvanja nastavnog kadra se neosnovano uvećavao. Naime, Pravilnikom o plaćama decidno je regulisano da se samo za određene poslove radnih mjesta obračun plaća uvećava u procentima od 10% do 30%. Osnov obračuna plaća su zaključeni ugovori o radu, koji podatke o plaći, dodacima na plaću, naknadama te periodima isplate konkretno ne sadrže, osim konstatacije da se plaća prima u skladu sa aktima (zaključcima, odlukama). Smatramo da podaci o plaći trebaju da čine sadržaj ugovora i da isti predstavljaju osnov za obračun, ne ostavljajući nedorečenost obračunskoj službi da u svezi naziva radnog mjesta procjenjuje i određuje vrijednost koeficijenta. Obračun penzijskog staža također se obračunavao po stopama 0,57% za žene i 0,6% za muškarce, a zakonskim propisima iz oblasti penzijskog staža i radnog odnosa, stopa obračuna je jedinstvena 0,5%.

Potrebno je da nazivi radnog mjesta iz Pravilnika o plaćama budu usklađeni sa radnim mjestima iz Pravilnika o organizaciji i sistematizaciji i da istim budu obuhvaćena sva radna mjesta na Fakultetu sa utvrđenom vrijednošću koeficijenta svih radnih mjesta, kao i uvećanje obračuna plaće po osnovu penzijskog staža uskladiti sa važećim propisima.

Potrebno je da Ugovori o radu u skladu sa Zakonom o radu sadrže sve podatke, plaću, dodatke na plaću, naknade te periode isplate.

Naknade troškova zaposlenih iskazani su u iznosu od 919.156,38 KM i u odnosu na plan manji su za 1,65%.

U strukturi naknada izdaci se odnose na naknade za topli obrok, regres za godišnji odmor, prijevoz na posao i sa posla, naknade za komisije i naknade Upravnom odboru.

Naknade za topli obrok iskazane su 529.548,00 KM i iste su isplaćivane gotovinski iz blagajne na osnovu mjesečnih odluka Dekana Fakulteta u iznosima od 10,00 do 11,00 KM za dane provedene na radu. Iskazani izdaci za april u iznosu od 43.061,00 KM i juli 34.950,00 KM vršeni su akontativno prije isteka mjeseca. Pored redovnog obračuna i isplate naknade za topli obrok, Odlukom Dekana od 26.09.2006. godine isplaćena je razlika naknade za ishranu tokom rada za 2006. godinu po zaposlenom od 150,00 KM. Navedenom Odlukom nije precizirano na koji period (po mjesecima) se odnosi Razlika isplate toplog obroka niti ukupan iznos razlike po uposlenom. Odlukom Upravnog odbora od 15.12.2006. godine odobrena je i druga isplata, jednokratne naknade po 200,00 KM zaposlenicima Fakulteta u iznosu od 39.690,00 KM, a na ime ostvarene razlike sredstava za isplatu regresa, toplog obroka u toku 2006. godine u jednom dijelu i u drugom dijelu na ime akontacije za isplatu toplog obroka za 2007. godinu, od čega je iznos od 29.775,00 KM evidentiran kao neto plaće, sa obračunatim porezima i doprinosima, a preostali dio na ime toplog obroka 3.960,00 KM i regresa 5.955,00 KM. Navodimo da je Odluka donesena u vremenu promjene lica ovlaštenih za zastupanje i predstavljanje Fakulteta i da nije izvršena izmjena i dopuna navedene odluke iz razloga što evidencija potvrđuje da se realizacija navedenog iznosa ne odnosi na dio akontacije za 2007. godinu, (već je ista evidentirana u izdatke 2006. godine) kako je bilo uređeno Odlukom, odnosno realizacija

je izvršena bez odgovarajuće Odluke koja bi od strane Upravnog odbora odobrila način navedene isplate. Uredbom o naknadama i drugim materijalnim pravima koja nemaju karakter plaće uređeno je da se topli obrok isplaćuje za dane prisustva na poslu i nema osnova vršiti isplatu prije kraja tekućeg mjeseca kao i akontativno za naredni mjesec.

Potrebno je obračun i isplatu toplog obroka vršiti u skladu sa Uredbom o naknadama i drugim materijalnim pravima koja nemaju karakter plaće za dane provedene na radu po isteku svakog mjeseca, a svaku realizaciju da prati odluka organa ovlaštenog za raspolaganje sredstvima Fakulteta.

Troškovi prijevoza na posao i sa posla iskazani su od 93.386,80 KM. Na osnovu Ugovora o kupoprodaji karata od 06.01.2006. godine, koji je zaključen između KJKP Gradskog Saobraćaja Sarajevo i Fakulteta za kupovinu godišnjih karata na donosioca bez slike i imena i godišnjih karata na ime i sa slikom, utvrđeno je da zaključeni ugovor ne sadrži broj karti po navedenim vrstama za uposlenike Fakulteta, a iskazana je godišnja pojedinačna vrijednost karti (godišnja na donosioca 713,00 KM, godišnja na ime sa slikom 583,00, KM i mjesečne pretplatne karte kuponi na ime i sa slikom 53,00 KM). Prezentirane fakture 1394/06 na 69.874,00 KM i 1418/06 na 30.316,00 KM potvrđuju da je KJKP Gradski Saobraćaj navedeni iznos fakturisao po osnovu broja korisnika određenih od Gradskog saobraćaja. Uredba o naknadama i drugim materijalnim pravima koja nemaju karakter plaće uređila je pravo na naknadu troškova prijevoza uposlenicima **isplatom visine najviše cijene mjesečne ili dnevne karte u javnom saobraćaju na određenoj relaciji i ista ne poznaje korištenje godišnjih karti na donosioca bez slike i imena i godišnjih karti na donosioca na ime i sa slikom**, što dovodi u pitanje opravdanost ovakvog načina isplate troškova prijevoza uposlenih i funkcionisanje internih kontrola u ovom segmentu.

Obračun i isplatu naknada za prijevoz na posao i sa posla potrebno je vršiti u skladu sa Uredbom o naknadama i drugim materijalnim pravima koja nemaju karakter plaće u FBiH, isplatom naknade u visini mjesečne ili dnevne karte u javnom saobraćaju na određenoj relaciji.

Izdaci za materijal i usluge iskazani su 2.368.510,00 KM i u ukupnim rashodima i izdacima Fakulteta učestvuju sa 35,51% i u odnosu na prethodnu godinu veći su za 114.450,00 KM. U okviru ovih izdataka najveći dio se odnosi na ugovorene usluge, koje u ovoj kategoriji rashoda učestvuju sa 74,12%.

Ugovorene usluge (1.755.627,00 KM) najvećim dijelom se odnose na naknade po osnovu autorskog honorara, ugovora o djelu, ostalih stručnih usluga, usluge medija, štampanja, informisanja i reprezentacije.

Izdaci za autorske honorare iskazani su u iznosu od 1.585.494,02 KM. Prezentirana dokumentacija (zaključeni ugovori) potvrđuju, da je nastavni kadar Fakulteta pored plaća ostvarivao i isplate po osnovu autorskih honorara po osnovu izvršenih usluga na drugim fakultetima, (Stomatološkom i Visokoj zdravstvenoj školi). Također su prezentirani zaključeni ugovori na osnovu kojih je nastao i trošak za isplaćeni autorski honorar za angažirani nastavni kadar u znatnom broju sa Kliničko Medicinskog centara Kantona, za nastavu na Medicinskom fakultetu. Prezentirani pojedinačni ugovori potvrđuju da su isplate vršene mjesečno u visini jedne šestine od ugovorenog iznosa (iznosi su fiksno ugovoreni). Period na koji se odnosi obavljanja usluga iz ugovora (koji su prezentirani) je 5 mjeseci (01.10.2006.-28.02.2007.godine) sa ugovorenim fiksnim iznosima od 780,00 KM do 3.150,00 KM. Iz navedenih ugovora nije vidljivo, za koji nastavni predmet se angažira saradnik, za koji fond sati, a Pravilima Fakulteta je uređeno da sedmični fond sati za studente (predavanja, vježbi) ne može biti veći od 30 časova. Iz tih razloga i cijenimo da ugovoreni odnos između Fakulteta i angažiranih saradnika treba biti potpun sa uređenim nastavnim predmetom i fondom sati za taj predmet sa obavezom podnošenja izvještaja izvršenog ugovorenog posla, što treba da potvrdi osnov obračuna i isplate, odnosno osnovanost iskazanih troškova. Također za prezentirane ugovore zaključene u obliku ugovora–autorskog honorara, ne može se potvrditi da u svim slučajevima imaju karakter ugovora o autorskom djelu, odnosno predavanja po nastavno-naučnom programu Fakulteta ne mogu imati karakter autorskog djela u skladu sa Zakonom o porezima Kantona Sarajevo i na iste se nisu mogli obračunavati porezi na prihod od autorskih prava čija je stopa niža od stope obračuna poreza da su zaključeni odgovarajući oblici ugovora, što je po našoj procjeni imalo za posljedicu obračun i uplatu poreza po nižoj stopi.

Potrebno je ugovorenim odnosom sa angažiranim saradnicima urediti prava i obaveze, nastavni predmet, fond sati za nastavni predmet sa obavezom podnošenja izvještaja o održanom predavanju,

vježbi i zaključivati odgovarajuće oblike ugovora koji će i predstavljati osnov za primjenu obračuna i uplate poreza po odgovarajućoj stopi.

Izdaci po osnovu ugovora o djelu iskazani su 39.039,00 KM. U okviru ovih izdataka su izdaci po osnovu zaključenih ugovora o djelu između Medicinskog fakulteta i izvršioca posla koji imaju status zaposlenika KMC Kantona za poslove korespondencije sa Fakultetom, o održanoj nastavi, nastavnog kadra angažiranog za potrebe Fakulteta sa KMC Kantona isplaćeno 3.000,00 KM po zaključenim pojedinačnim ugovorima od 300,00 KM. Također prezentirana dokumentacija potvrđuje trošak po osnovu ugovora o djelu zaključenih na osnovu Odluke Dekana Fakulteta o isplati naknade za rad u Odboru proslave 60. godišnjice Medicinskog fakulteta, članovima Odbora od 2.000,00 do 700,00 KM, što ukupno iznosi 4.400,00 KM. U strukturi ovih troškova su i troškovi po osnovu Odluke Dekana fakulteta o imenovanju stalnog koordinatora Dekanske Konferencije čije je sjedište na Fakultetu sa pravom na honorar od 500,00 KM mjesečno i što je određeno ugovorom o djelu između Fakulteta i izvršioca posla, uposlenika Fakulteta sa obavezom vršenja poslova sekretara dekanske konferencije i vođenja administrativnih i tehničkih poslova rada navedene konferencije. Evidentirani troškovi potvrđuju da se realizacija nije vršila na ugovoren način u mjesečnim iznosima od 500,00 KM, naprotiv evidencija potvrđuje realizaciju u iznosima od 1.000,00 KM 22.09.2006. godine, 1.000,00 KM 22.11.2006. godine. Obzirom na karakter Dekanske konferencije i da je ista univerzitetskog karaktera smatramo da bi finansiranje troškova koordinatora trebali da snose i ostali fakulteti Univerziteta imenovanjem rotirajućeg sekretara.

Potrebno je realizaciju zaključenih ugovora vršiti u skladu sa odredbama iz ugovora, a koji su potpisani i ovjereni od rukovodnih organa Fakulteta.

4.3. Stanje imovine, potraživanja i obaveza

U računovodstvenom iskazu Bilans stanja sadašnja vrijednost stalnih sredstava iskazana je u iznosu od 7.415.734,00 KM (nabavna vrijednost 22.993.129,00 KM i otpisana 15.577.395,00 KM). Utoku 2006. godine izvršena je nabavka opreme u iznosu od 112.274,94 KM i rekonstrukcija i investiciono održavanje 36.141,40 KM. Odlukom Dekana Fakulteta od 21.12.2006. godine formirane su komisije za popis imovine, prava, obaveza i potraživanja po institutima, katedrama i službama na dan 31.12. 2006. godine, kao i Centralna komisija koja će elaborirati rad ostalih navedenih komisija i Dekanu podnijeti izvještaj do 31.01.2007. godine. Prezentirana odluka potvrđuje znatno zakašnjenje u formiranju komisija, a što se odrazilo na obim i kvalitet izvršenog popisa. Većina izvještaja popisnih komisija ne sadrži iznose utvrđenog stanja po popisu i knjigovodstvenog stanja, kao ni iznose vrijednosti predloženih sredstava za otpis. Knjigovodstvena evidencija potvrđuje da je isknjižena vrijednost po osnovu odluke Upravnog odbora od 31.01.2007. godine kompjuterske opreme 52.801,67 KM, kancelarijske opreme 20.853,90 KM, namještaja 1.675,00 KM tj. ukupno 75.330,57 KM, od čega je iznos od 27.683,64 KM isknjižen na teret izvora sredstava, a razlika od 47.646,93 KM na teret ispravke vrijednosti stalnih sredstava. Izvještaj Centralne popisne komisije ne potvrđuje da je izvršen popis potraživanja i obaveza na dan 31.12.2006. godine, što ukazuje da Izvještaj nije kompletan, odnosno ne sadrži stanja po popisu i stanja po knjigovodstvenoj evidenciji cjelokupne imovine, odnosno obaveza i potraživanja, obzirom da prema prezentiranoj dokumentaciju sa 31.12. 2006. godine neevidentirana potraživanja Fakulteta iznose 118.969,86 KM.

Potrebno je da Fakultet popisom uskladi stanja sredstava i njihovih izvora iskazanih u knjigovodstvu sa stvarnim stanjem utvrđenim popisom u skladu sa Pravilnikom o knjigovodstvu budžeta FBiH i da popisom obuhvati i potraživanja i obaveze, blagovremeno poduzme radnje imenovanja komisija jer se stanje utvrđuje na dan 31.12. 2006. godine, kao i da sagleda stvarnu osnovanost isknjižavanja opreme u navedenoj vrijednosti.

Dugoročni plasmani iskazani su od 70.000,00 KM, a odnose se na deponovana sredstva kod Univerzal banke Sarajevo po osnovu Odluke Sekretara Medicinskog fakulteta od 31.12.1999. godine o deponovanju namjenskih sredstava na period 15 godina sa godišnjom kamatnom stopom od 2% za komisione kredite za rješavanje stambenog pitanja uposlenika Fakulteta. Nije prezentiran ugovor o deponovanim sredstvima između Fakulteta i banke iz kojeg bi se tačno mogle vidjeti obaveze banke prema fakultetu. Prezentiran je Ugovor o kreditu između navedene banke i zaposlenika Fakulteta zaključen 07.01.2000. godine kojim banka odobrava gotovinski kredit korisniku na navedeni iznos sa rokom otplate 15 godina sa jednakim mjesečnim anuitetom od 517,78 KM, a za koju namjenu ugovorenim odnosom nije određeno. Prema obrazloženju

nadležnih Fakultet ne raspolaže podacima toka otplate i stanja naplaćenih sredstava po zaključenom ugovoru. U toku revizije poslat je zahtjev banci za dostavu podataka o stanju uplaćenog depozita, zašto do okončanja revizije nije dostavljena povratna informacija.

Potrebno je utvrditi namjenski utrošak deponiranih sredstava, da li se obaveza uredno izmiruje i stanje naplaćenog iznosa, stanje potraživanja po zaključenom ugovoru.

Kratkoročna potraživanja iskazana su od 25.010,99 KM, a ista se najvećim dijelom odnose na potraživanja za usluge od zakupa prostora Fakulteta iz 2006. godine. Potraživanja 13.456,74 KM od New Concept Garden Sarajevo po osnovu ugovorenog odnosa o zakupu prostora. Iznos od 8.788,19 KM također potraživanja po osnovu ugovora o zakupu poslovnog prostora sa «Klas» Sarajevo i potraživanja od 802,56 KM od «Pharmacology» d.o.o. Sarajevo. S obzirom da je ugovoreno mjesečno plaćanje i da se obaveze izmiruju u mjesečnim iznosima iskazana potraživanja potvrđuju da se nisu poduzimale adekvatne mjere za naplatu. Iz prezentirane dokumentacije sa 31.12. 2006. godine neevidentirana potraživanja Fakulteta čine iznos od 118.969,86 KM i to neevidentirana potraživanja iz prethodnih godina (2003, 2004, 2005, i 2006.g. 21.092,14 KM, 42.262,40, 23.740,96 KM, 31.874,36 KM). Potraživanja se odnose najvećim dijelom na potraživanja po izdatim računima za izvršene dijagnostičke usluge Instituta za genetiku i Mikrobiologiju Fakulteta Zavodu zdravstvenog osiguranja ZE-DO Kantona. Izvještaj Komisije za popis ne sadrži podatke o knjigovodstvenom niti utvrđenom stvarnom stanju potraživanja po popisu, niti je u istom naznačeno da postoje potraživanja, a da nisu evidentirana, što ne možemo potvrditi stanje iskazanog potraživanja.

Potraživanja evidentirati u skladu sa Pravilnikom o knjigovodstvu budžeta FBiH na urednoj i vjerodostojnoj dokumentaciji o osnovi nastanka potraživanja, njihovoj naplati i visini.

Kratkoročne tekuće obaveze i razgraničenja iskazana su od 1.082.276.07 KM, a odnose se na obaveze prema dobavljačima (248.570,78 KM), obaveze prema zaposlenim za plaće, poreze i doprinose za decembar 2006. godine (334.536,80 KM) i kratkoročna razgraničenja, unaprijed naplaćeni prihodi (499.168,49 KM).

Obaveze prema dobavljačima za isporučenu robu i usluge iznose 96.820,82 KM, od čega se najvećim dijelom odnose na izdatke za komunalne usluge iz decembra 2006. godine. Obaveze po obustavljenim porezima i doprinosima 23.025,96 KM i obaveze prema fizičkim licima od 128.724,00 KM koje se odnose na obaveze prema spoljnim saradnicima.

Uvidom u prezentiranu dokumentaciju utvrđeno je da se trošak ne evidentira u periodu u kojem je obaveza i nastala, odnosno trošak se evidentira u jednom mjesecu, a obaveza u drugom mjesecu, što nije u skladu sa Pravilnikom o knjigovodstvu budžeta u FBiH Također obaveze su se evidentirale sa znatnim zakašnjenjem (do 45 dana od dana izdavanja fakture, račun Printex d.o.o. Sarajevo od 12.01.2006. godine 15.350,40 KM evidentiran 31.03.2006. godine, račun od Interlingua Sarajevo od 10.03.2006. godine evidentiran 31.03.2006. godine). Fakultet nije vodio knjige ulaznih i knjige izlaznih faktura, odnosno primljene fakture nisu evidentirane, tako da ne mogu potvrditi vrijeme prijema, nedostaje broj evidencije kufa, što ukazuje da se evidentiranje obaveza i evidentiranje primljenih faktura nije vršilo u skladu sa Pravilnikom o knjigovodstvu budžeta u FBiH, što potvrđuje da interne kontrole u ovom segmentu su nezadovoljavajuće.

Obaveze treba evidentirati u skladu sa Pravilnikom o knjigovodstvu budžeta u FBiH vremenu kada je obaveza nastala, bez obzira kada će se izvršiti plaćanje i obavezno vođenje pomoćnih knjiga (ulaznih i izlaznih faktura).

5. ZAKLJUČAK

Revizijom finansijskih izvještaja Medicinskog fakulteta u Sarajevu za 2006. godinu utvrđeno je da osnivač fakulteta, Vlada kantona i Ministarstvo obrazovanja i nauke nisu poduzimali potrebne mjere u cilju obezbjeđenja poslovanja fakulteta u skladu sa Zakonom o trezoru u FBiH. Nije osiguran adekvatan sistem internih kontrola, koji se posebno odnosi na evidentiranje poslovnih promjena, donošenje finansijskog plana Fakulteta, kao i izmjene i dopune Finansijskog plana, akontativni obračun i isplatu toplog obroka. Revizijom je konstatovano da jedan broj akata Fakulteta nije predložen, odnosno usvojen od rukovodstva Fakulteta i organa upravljanja na Fakultetu.

Posebnu pažnju skrećemo na nepotpun popis potraživanja i obaveza i neevidentiranje potraživanja iz prethodnih godina. Izvještaj o popisu potraživanja i obaveza ne sadrži stanje po knjigovodstvu, stanje po popisu.

U cilju efikasnijeg izvršenja budžetskih sredstava i dosljedne primjene zakona i drugih propisa potrebno je da se pristupi izmjeni postojećeg Pravilnika o unutrašnjoj organizaciji Fakulteta u dijelu opisa radnih mjesta i broja potrebnih izvršilaca.

Konstatovani su propusti kod troškova autorskih honorara, nastali po osnovu zaključenih ugovora o autorskom honoraru, a ugovoreni poslovi nemaju karakter autorskog djela, honorara, što su povlačili i pogrešan obračun poreza tj. poreza na autorska djela čija je stopa niža od stope da je zaključen odgovarajući oblik ugovora.

KOMENTAR

U ostavljenom roku Medicinski Fakultet dopisom broj 29-3715/07 od 27.11.2007. godine, očitovao se na Nacrt Izvještaja o izvršenoj reviziji finansijskih izvještaja Medicinskog fakulteta u Sarajevu za 2006. godinu. U navedenom očitovanju data su određena obrazloženja na utvrđene nepravilnosti, kojima su pojašnjene okolnosti nastanka istih. Navedenim očitovanjem također je naglašeno da su već poduzete mjere za otklanjanje utvrđenih nepravilnosti, koje se posebno odnose na naplatu potraživanja iz ranijih godina, donošenje pravilnika o sticanju i raspodjeli vlastitih prihoda, kao i odustajanja od načina kupovine godišnjih karata za uposlenike Fakulteta. Također je dato obrazloženje da je donesen Pravilnik o organizaciji i sistematizaciji, ali nije u primjeni iz razloga izmjene propisa iz oblasti visokog obrazovanja.

Na kraju koristimo priliku da se zahvalimo na saradnji nadležnih na Fakultetu, koji su toku revizije prihvatili preporuke i sugestije Ureda za reviziju institucija u FBiH, a prema očitovanju na Nacrt izvještaja, iste će nastaviti i u narednom periodu (poslije predaje konačnog teksta Izvještaja), a sve u cilju obezbjeđenja zakonitosti, transparentnosti i efikasnosti trošenja javnih sredstva.

Viši revizor
Mirsada Janjoš, dipl. oec.

Revizorski tim:
Hajra Imširović, dipl. Iur.
Mirko Mišić, dipl. oec.